

## ■ COLUMNA

# Il principi dad Eisenhower fa vacanzas

DA GION CAVIEZEL

**G**rad ussa vulevel jeu aunc rispunder spert in e-mail, cheu scalina il telefon. «Jeu less buca disturbar, mo igl ei aschia che...». Il rest audel jeu buca pli, en l'escha stat ina scolasta: ei seigi urgent.

**J**eu interrumpel il telefonat, la scolasta siara l'escha davos ella. Quei ei schon inagada buca bien. Cheu dat ei segir in problem pli grond da sligiar.

**S**uentermiezgi las tschun less jeu far uorden sin pult. Buc in soli e-mail hai jeu rispundiu, plunas da pupi sin meisa, in disorden ed jeu less ir en vacanzas. Aunc questa sera less jeu serrar il biro ed udir nuot pli dalla lavur. Gie. E co far?

**J**eu seregordel d'in cuors che jeu hai fatg: luvrar suenter il principi da Eisenhower. Igl anteriur president dall'America ha inventau quei principi: ina pluna cun tgei che seigi impurtont. Lu in'otra pluna cun tut quei che fuss urgent. Ed ina pluna impurtont ed urgent. La quarta pluna ei ni urgent ni impurtont.

**Q**uei ei fatg spert ed ei in bi mirar. Mo jeu se-



damondel, daco ei tut sin la pluna: impurtont ed urgent?

**J**eu mirel sin l'ura. Miar da, jeu hai empermess dad esser pli baul a casa.

**E**ra quei adina aschia, cuort avon las vacanzas? Sun jeu mez la cuolpa? Hai jeu la malsogna verschiebitis? Ni vess jeu saviu far la lavur in tec pli spert ni pli baul ni schizun suenter in plan?

**E**i nezegia nuot pli. Uss eisi aschia. Lu mirel jeu sin il finistrel, click: vuleis vus stizzar quei e-mail per adina ed irrevocabel?

**G**iuadora tarlischa il sulegl, a casa spetga la dunna, e sin meisa las plunas da pupi.

**G**ie!

**C**lick e naven ei quei e-mail.

**Q**uei inspirescha mei.

**V**uleis vus stizzar tut ils e-mails per adina ed irrevocabel.

**G**ie! Bugen!

**Q**uei fa plascher. Jeu sclaudel il computer. Las plunas da pupi sin meisa spetgan mei. Cun la bratscha stauschel jeu tut el canaster da pupi. La meisa ei vita. Quei ei in bien sentiment.

**T**gei che ei veramein impurtont vegn pupspei.

**E**l corridor clomel jeu aunc: bialas vacanzas!

**E**cura ch'igl aviun se-saulza en direcziun dil blau dil tschiel, jeu mirel ord la finiastra pintga, il sulegl tarlischa cuort, niblas, jeu sentel co igl aviun semetta en ina storta, la pressiu sin las ureglias crescha, jeu siarel cuort ils egls ed expireschel profundamein.

**U**ssa. Vacanzas.